

# 水高翁紀德祝壽碑

德聞於鄉黨功施乎郡邑老雖失明志行真摯言論精到以使後進子弟知所適從若吾小高翁者安可不祝壽紀德以旌表之乎哉翁諱秀通稱泰介小高氏埼玉縣比企郡牛谷戸人家世里正翁以文政九年四月生容貌魁梧資性沈毅少壯喜擊刺技師事劔客比留間利充學甲源一刀流極其蘊奧乃去遊東海南海畿内諸道後寓於江之日野來學者頗衆亡何入江戸與諸流老手角技技益進遂歸開場授徒名動鄉邑嘉永五年父秀宣歿翁襲其職為里正安政元年為小組合總代五年荒川大水堤塘殆壞先是弘化三年川越藩主欲築巨堤於郡之松永村間瀨口以達山谷戸會藩政多故不果翁與川島村民謀曰築堤議興已十四年遂巡未成是以水患屢至吾輩豈可坐視乎乃請藩主以起輪環之堤堤遂成周迴七里餘堅牢無比闔邑賴之藩主嘉賞許稱姓帶刀文久三年藩主赴京翁為鄉夫差配役從焉元治元年竣役歸藩主錄其勞賜頭取格既而翁病失明告老有三男長曰市松蚤歿次曰金吾嗣季曰與作為郡之上伊草村中村其所養今翁年七十有七矣其與賓客子弟話快辯如壯者時把長劔揮霍跳舞有伏波據鞍之概頃者門人有志相議欲建豐碑以紀德祝壽來謁銘於余余為本縣代議士略知翁為人乃銘曰

壽高德隆  
老去恬退

身健志雄  
子弟欽從

半生事業  
家道斯肅

維誠維忠  
福祿斯鍾

明治三十五年十月

正二位勳一等伯爵大隈重信篆額

正五位法學博士高田早苗撰

草川重遠書

后工川越六反

山崎鶴年鐫

